

Акафист Пресвятой Богородице



перед Ея иконой, именуемой “Почаевская” с
Молебнем

Священник: Благословен Бог наш всегда, ныне, и присно, и во веки веков.

Хор: Аминь.

Диакон: Слава Тебе, Боже наш, слава Тебе.

Люди: Царю Небесный, Утешителю, Душе истины, Иже везде сый и вся исполняй, Сокровище благих и жизни Подателю: прииди и вселися в ны, и очисти ны от всякия скверны, и спаси, Блаже, души наша.

Чтец: Святой Боже, Святой Крепкий, Святой Безсмертный, помилуй нас. (х 3).

Слава Отцу, и Сыну, и Святому Духу, и ныне и присно, и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имени Твоего ради.

Господи, помилуй (х 3).

Слава Отцу, и Сыну, и Святому Духу, и ныне и присно, и во веки веков. Аминь.

Отче наш, Иже еси на небесех. Да святится имя Твое; да приидет Царствие Твое; да будет воля Твоя, яко на небеси и на земли. Хлеб наш насущный даждь нам днесь. И остави нам долги наша, якоже и мы оставляем должником нашим. И не введи нас во искушение, но избави нас от лукаваго.

Священник: Яко Твое есть царство, и сила, и слава, Отца, и Сына, и Святаго Духа, ныне и присно, и во веки веков.

Чтец: Аминь.

Бог Господь

Диакон (глас 5): Бог Господь, и явися нам, благословен Грядый во имя Господне. Исповедайтеся Господеви, яко Благ, яко в век милость Его.

Хор: Бог Господь, и явися нам, благословен Грядый во имя Господне.

Диакон: Обышедше обыдоша мя, и именем Господним противляхся им.

Хор: Бог Господь, и явися нам, благословен Грядый во имя Господне

Диакон: Не умру, но жив буду, и повем дела Господня.

Хор: Бог Господь, и явися нам, благословен Грядый во имя Господне.

Диакон: Камень, егоже небрегоша зиждущи, сей бысть во главу угла, от Господа бысть сей и есть дивен во очесех наших.

Хор: Бог Господь, и явися нам, благословен Грядый во имя Господне.

Тропарь, глас 5: Пред святою Твоею иконою, Владычице, молящиеся исцелений сподобляются, веры истинныя познание приемлют и агарянская нашествия отражают. Темже и нам, к Тебе припадающим, грехов оставление испроси, помыслы благочестия сердца наша просвети, и к Сыну Твоему молитву вознеси о спасении душ наших.

Кондак глас 1: Источник исцелений и веры Православныя утверждение Почаевская Твоя икона, Богородице, явися, темже и нас, к ней притекающих, от бед и искушений свободы, лавру Твою невредиму сохрани, Православие во окрест стоящих странах утверди и грехи разреши молитвенник Твоих: елика бо хочещи, можещи.

Кондак 1

Взбранной Воеводе родов христианских и страны наша известней Избавительнице хвалебныя песни принесем, вернии, на святей горе Ея собравшися; Ты же, яко имущая милосердие неизреченное, О Владычице Богородице, моления нашего пред чудотворным Твоим образом возносимаго не отвержи, да в умилении сердец зовем Ти: Радуйся, Похвало Почаевская и всего мира Надеждо и Утешение.

Люди: Радуйся, Похвало Почаевская и всего мира Надеждо и Утешение.

Икос 1

Архангел Гавриил первее радуйся тебе приношаше, Владычице, егда зачатие Сына Божия благовествоваше, по преславнем же Успении Твоем вся Небесныя силы туюжде хвалу на Небеси Тебе непрестанно приносят; како убо мы, грешнии, своя гласы с гласы Безплотных совокупити дерзнем? Обаче милосердие Твое ко всем кающимся поминающе, устне наша со страхом и любовию отверзаем, глаголюще сице:

Радуйся, милости бездно;

Радуйся, любве неистошное море.

Радуйся, рода христианскаго Благая Предстательнице;

Радуйся, обители Почаевския стено нерушимая.

Радуйся, православныя люди на гору Почаевскую узами любве привлекающая;

Радуйся, всякую печаль от душ их отгоняющая.

Радуйся, Еяже чудотворный образ, яко звезда, от горы Почаевския нас путеводствует;

Радуйся, Ейже возносимыя молитвы страстныя прилоги вскоре отражают.

Радуйся, явлением Своим на горе сей люди утешившая;

Радуйся, след стопы Твоея на ней нам оставившая.

Радуйся, верных присное дерзновение;

Радуйся, сумнящихся доброе утверждение.

Радуйся, Похвало Почаевская и всего мира Надеждо и Утешение.

Кондак 2

Видевше пустынницы почаевстии и протец Иоанн босый Пресвятую Богородицу на скале во огненном столпе явльшуюся, след стопы Ея налобызаху и водою, zde камени истекшею, окропляяся, вопияху Богу: Аллилуиа.

Люди: Аллилуиа (x 3)

Икос 2

Разум недоразумеваемый о явлении Твоем, Владычице, ищущее, в сиевом уповании утверждает, яко первее от агарян, послеще от еретиков оплот Православия на горе Почаевстей утвердiti благоволила еси, сего ради в Твой святыи храм приходяще, теплою верою сердца наша исполняем, глаголющи:

Радуйся, истинныя веры утверждение;

Радуйся, зловерия явное обличение.

Радуйся, древле в Неопалимей Купине Синайстей известившаяся;

Радуйся, христианом в столпе огненном зде явившаяся.

Радуйся, яко в пещи горящей, росою спасении, Авраамстии отроцы Тя предвозвестиша;

Радуйся, яко водою от следа стопы Твоя исцелении благодать Твою проповедаша.

Радуйся, землю нашу, древле от агарян разоренную, явлением Твоим тогда утешившая;

Радуйся, и ныне многими знаменьями молящихся зде ободряющая.

Радуйся, кающихся скорое услышание;

Радуйся, подвижающимся помощь и прибежище.

Радуйся, и неведущих вразумление;

Радуйся, и малодушных укрепление.

Радуйся, Похвало Почаевская и всего мира Надеждо и Утешение.

Кондак 3

Силу сугубыя благодати явила еси, Владычице, на горе Почаевстей, егда место явления Твоего по триех стех летех чудотворною иконою Своею обогатила еси, юже рукою святителя Неофита Еллина, из Москвы грядущаго, первее боярине Анне даровала еси, потом же от нея во обитель Почаевскую прияла еси, радующимся людем и поющим Богу: Аллилуиа

Люди: Аллилуиа (х 3)

Икос 3

Имущи в дому своем икону Твою, Владычице, боярinya Анна, и исцеление от нея слепорожденному брату своему Филиппу бывшее уведевши, абие духом ревности о славе Твоей возгоре и обитель из камене во имя Пречестнаго Успения Твоего пустынноком почаевским устрояет, в ней же чудотворному образу Твоему поклоняющихся взывает сиче:

Радуйся, сокровище богатное в Твоей святей иконе нам преподавшая;

Радуйся, святителя рукою дарованным образом Твоим землю нашу освятившая.

Радуйся, души наша от земнаго богатства отвращающая;

Радуйся, Славу Божию пети нас научающая.

Радуйся, яко чудеса Твоя зряще, к Небеси сердца своими восхищаемся;

Радуйся, яко во обители Твоей, аки в преддверии рая обретаемся.

Радуйся, православныя люди иконою Твоею утешившая;

Радуйся, от всех стран молящихся люди во обитель Почаевскую призывающая.

Радуйся, еуже вера умножается;

Радуйся, еуже уныние отгонится.

Радуйся, иноков почаевских присное Радование;
Радуйся, мирских людей непостыдное Упование.
Радуйся, Похвало Почаевская и всего мира Надеждо и Утешение.

Кондак 4

Буря еретического неистовства на святую обитель Твою устремившись, Владычице, святую икону Твою рукою злых иконоборцев пленивши и на злохуление тех подвигши, вскоре гневом Божиим удержана бысть, егда невидимая сила безстыдне пиршествующия хульники, аки Артаксеркса и Ирода, сляче и в недуг вверже, над святынею Твоею ругавшихся и не уведевших пети: Аллилуиа.

Люди: Аллилуиа (х 3)

Икос 4

Слышаша иноцы почаевстии и вси православнии людие, яко святая икона Твоя по семнадцатых летех еретического пленения во святую обитель от посрамленных хулителей возвращается, абие на сретение ея изыдоша и плач свой на радость преложише, вопияху Тебе:

Радуйся, христианом прибежище;
Радуйся, еретиков обличение.
Радуйся, обитель Почаевскую иконы Твоя до конца не лишившая;
Радуйся, злохуление иконоборцев посрамившая.
Радуйся, яко в бедах не унывати и нас научаеши;
Радуйся, яко Правосудию Божию веровати нам повелеваеши.
Радуйся, Еюже Православие во стране нашей утвердися;
Радуйся, Еюже и вся вселенная воплощенную истину прияти сподобися.
Радуйся, долготерпение Божие подражающая;
Радуйся, в терпении люди Твоя утверждающая.
Радуйся, яко смиреннии Тобою утешение приемлют;
Радуйся, яко горделивии Тобою смиряются.
Радуйся, Похвало Почаевская и всего мира Надеждо и Утешение.

Кондак 5

Боготечная звезда ищущим спасения явилася еси, Владычице, к Солнцу Правды сих приводящая, якоже бо в земнем житии Твоем о людех Предстательница к Сыну Твоему в Кане Галилейстей показала еси, тако и по преславном Твоем на Небеса отшествии, моления о верных от конец земли приносимая к Сыну Твоему возносиши и zde, на горе Почаевстей, исцеления многообразная от Него людям подаеши, вопиющим Богу: Аллилуиа.

Люди: Аллилуиа (х 3)

Икос 5

Видеша людие, на гору Почаевскую, якоже в древняя, тако и в последняя лета притекающие, множества исцелений, Тобою подаваемая, в желании спасения души своя утверждаху и о гресех своих покаяние теплое приношаху, вопиюще Тебе:

Радуйся, слепых прозрение и хромых исцеление;

Радуйся, бесных от демонов избавление.
Радуйся, плененного инока во обитель Твою на воздухе чудесне возвратившая;
Радуйся, младенца Симеона предумерша по молитве старицы воскресившая.
Радуйся, яко в сих знаменних сила древних чудес Твоих людем паки явися;
Радуйся, яко исцеления от святых иконы Твоея и в последняя дни не оскудеша.
Радуйся, во всем мире источник исцелений от святых икон Твоих подающая;
Радуйся, паче сих духовными дарованьми молящихся обогащающая.
Радуйся, Еюже православному роду хвалятся;
Радуйся, к Еяже помощи и маловернии притекают.
Радуйся, земнородных упование;
Радуйся, Небесных чинов радование.
Радуйся, Похвало Почаевская и всего мира Надеждо и Утешение.

Кондак 6

Проповедницы славы Пречистой Девы явишася агаряне на обитель Почаевскую нашедшии и видения Пречистой Богородицы с преподобным Иовом первее не уразумевшии; егда бо стрелы, от них пуцаемыя, паки на ня устремишася, абие силу Владычицы проразумевше и покаяние о безумии своем принесше, верою возопиша: Аллилуиа.

Люди: Аллилуиа (х 3)

Икос 6

Возсия видение Твое, Владычице, на горе Почаевстей, егда братия обители, зело от агарян осаждаема, с велиим воплем моление пред святою Твоею иконою и пред ракою преподобного Иова возношаше, егда же братия агаряны, видением сим смятенныя и бежаша, виде, абие с веселием воспе Тебе сице:

Радуйся, Избавительнице наша и спасение;
Радуйся, рода христианского присное вспоможение.
Радуйся, нечестивыя враги от Твоея святых отгнавшая;
Радуйся, в покаяние их приводящая.
Радуйся, Еяже и невидимии спасения нашего врази трепещут;
Радуйся, Ейже Святии Ангели и преставльшиися праведницы на Небеси поклоняются.
Радуйся, преподобного Иова в молитву с Собою приемшая;
Радуйся, агаряны ко Святому Крещению видением Своим приведшая.
Радуйся, яко Тобою вернии страх смертный в конец отложиша;
Радуйся, яко Тебе ради нецыи от агарян богобоязненнии иноцы zde явишася.
Радуйся, истины присное изъявление;
Радуйся, заблуждающимся доброе вразумление.
Радуйся, Похвало Почаевская и всего мира Надеждо и Утешение.

Кондак 7

Хотящи желание Вечного Живота возгрети в сердцах христианских, Пресвятая Богородица болящая чудесы Своими исцеляет, бесы изгоняет, плененныя свободждает, мертвыя воскрешает, да мы вси, силу Божию уразумевше, земная возненавидим и о душах своих попечение приложим, непрестанно вопиюще Богу: Аллилуиа.

Люди: Аллилуиа (х 3)

Икос 7

Новья и тягчайшия беды претерпе обитель Почаевская, егда вкупе со всею страню от Православия лестию отторженная во обладание еретиков вдадеся, обаче прошедшим стом и десятым летом паки православным христианом вдана бысть, в нюже православнии иноцы, пришедше и святыя мощи преподобнаго Иова из-под спуда изъемше, к чудотворному образу Владычицы припадаху, глаголюще:

Радуйся, Православия защитнице;
Радуйся, еретиков обличительнице.
Радуйся, обитель Твою до конца не оставившая;
Радуйся, страху Божию нас научающая.
Радуйся, яко предстательством Твоим страна Волынская паки ко Православию возвратися;
Радуйся, яко от лет древних мнози еретицы Твоим вразумлением исправишася.
Радуйся, во святую Лавру Твою верных на молитву паки призывающая;
Радуйся, и неверныя zde поклонятися православною святыне научающая.
Радуйся, Юже праведницы и праведнии непрестанно воспевают;
Радуйся, в Нейже и падшии в покаянии притекают.
Радуйся, отступников к вере возвращение;
Радуйся, прельщаемых к свету истины возведение.
Радуйся, Похвало Почаевская и всего мира Надеждо и Утешение.

Кондак 8

Странное чудо зрим о Тебе, Богомати, елико бо телеснии недужи святыя Твоя иконы целованием и воды почаевския кроплением исцеляются, тако и душевныя страсти видением святыни Твоя отъемлются, вера утверждается и умиления сердца наша исполняются, поющих Богу: Аллилуиа.

Люди: Аллилуиа (x 3)

Икос 8

Весь аз недостойный грехами исполнился, мирскому рассеянию вдався и о души своей вознерадев, обаче на святую икону Твою, Владычице, взирая, и просвещение от нея безчисленным людем, zde приходящим, видя, паки на путь спасения устремляюся и в радости сердца воспеваю Ти сице:

Радуйся, чистоты сокровище;
Радуйся, милостей бездно.
Радуйся, к Сыну Твоему о верных моления выну приносящая;
Радуйся, моления грешных не отвергающая.
Радуйся, яко Тобою мнози отчаяния греховнаго избегоша;
Радуйся, яко призывающии имя Твое от падения страннаго возсташа.
Радуйся, Еюже иконоборная ересь во вселенней посрамися;
Радуйся, Еюже истинная вера Волынской стране возвратися.
Радуйся, к подвигу целомудрия души возводящая;
Радуйся, обидящим прощати научающая.
Радуйся сердце наших умилению;
Радуйся, душ наших упование.
Радуйся, Похвало Почаевская и всего мира Надеждо и Утешение.

Кондак 9

Всякия отступства и еретическая блуждания покаявшемуся народу земли Волынския отпустила еси, Владычице, и паки источник исцелений от чудотворныя Твоея иконы от следа стопы Твоея на горе Почаевстей в православной Лавре Твоей людем открыла еси, токмо аще покаяние о гресех своих принесут Богу и о Твоей помощи не сумнящеся, возопиют ему: Аллилуиа.

Люди: Аллилуиа (х 3)

Икос 9

Ветия славы Твоея явишася, Владычице, слепии и хромии исцеление от Твоея иконы, православным людем возвращенныя, приявши, яко и еретической жене некоей болящей, Тя в помощь призвати и по исцелении истинную веру исповедати и облобызати, нам же вопити Тебе сице:

Радуйся, Царя Небеснаго умоление:

Радуйся, земных присное предстательство.

Радуйся, от лютерских заблуждений жену некую недуга исцелением отвратившая;

Радуйся, вся люди во истине Православия уверившая.

Радуйся, яко Тебе ради православнии людие столькраты прельщения агарянская победиша;

Радуйся, яко Тебе ради и совращеннии от латын паки православную веру облобызаша.

Радуйся, к Нейже вси живуции молитвенно очи воздвизают;

Радуйся, Юже и молящиися о упокоении умерших в помощь призывают.

Радуйся, и от житейских нужд притекающия к Тебе изъемлющая;

Радуйся, паче сих всякия нужды претерпевающим крепость дарствующая.

Радуйся, христоробивому воинству во бранех вспоможение;

Радуйся, на демоны воинствующим благое наставление.

Радуйся, Похвало Почаевская и всего мира Надеждо и Утешение.

Кондак 10

Спасти хотяше, Пречистая Богородица, препростую некую старицу во ослеплении латынстем бывшую и внуку малую имущую, Православием убо просвещенную, но телесными очесы сле-потствующу, темже сима обема благое желание влагает, еже на горе Почаевстей чудотворному Ея образу поклонитися, идеже абие слепую отроковицу чудесне исцеляет и старицу православную веру исповедати научает, вопиющую Богу: Аллилуиа.

Люди: Аллилуиа (х 3)

Икос 10

Стена нерушимая истинныя веры явилася еси, Владычице, зане якоже нечестивии еретицы от прославления Тебе, яко Истинныя Богородицы, со упорством отвергошася, тако и православнии в вере Твоей тверди пребыша, и от молитв непрестанно Тебе приносимых николиже отвратитися восхошут, и сих ради еретических глагол во утеса своя приимати не дерзнут, но сердцем благодарным восхваляти Тя не престанут, глаголюще:

Радуйся, Христианом отрадо и утешение;
Радуйся, ангельским чином славо и поклонение.
Радуйся, от лъстивых глагол еретических нас отвращающая;
Радуйся, памятованием милостей Твоих умы наша к Богу возносящая.
Радуйся, святые апостолы ко Успению Твоему на облацех воздушных призвавшая;
Радуйся, и грешныя люди в той день на гору Почаевскую в тысящах и тмах на всяко лето собирающая.
Радуйся, Еяже ради христиане трудность пути, аки сладкое упокоеие, подъемлют;
Радуйся, Еяже ради и ленивии подражати им тщатся.
Радуйся, иноком сладость мирскую забыти благодатию Твоею пособствующая;
Радуйся, вспять озирающияся сновиденьми грозными устрашающая.
Радуйся, Церкви Христовы лучшая диадимо;
Радуйся, страны нашея щите неодолимый.
Радуйся, Похвало Почаевская и всего мира Надеждо и Утешение.

Кондак 11

Пение благодарное о Твоих, Владычице, благодеяниях во всем мире от христиан возносимое, аки фимиам к Небеси непрестанно восходящий помышляюще и наша убогая хваления не отвратити Тебе просим, еще же и благодать покаяния даровати Тебе молим, со упованием поюще Богу: Аллилуиа.

Люди: Аллилуиа (х 3)

Икос 11

Свет живота временного и Вечныя Жизни упование явилася еси, Владычице, человеку некоему в Бессарабии умрети имущему, но внезапно, по вкушении воды от святыни Почаевския, здраву бывшему, еже сродницы его видевше, со страхом и умилением Тебе воззваша:

Радуйся, болящих исцеление;
Радуйся, скорбящих слышание.
Радуйся, Тобою бо смерть пришедшая отгнася;
Радуйся, Тобою бо вера несумненная нам даровася.
Радуйся, яко предвещание Гавриила пред очию нашею сбывается;
Радуйся, яко от всех родов, по глаголу Твоему, ныне и присно ублажаешися.
Радуйся, гору Почаевскую, яко место пребывания Твоего освятившая;
Радуйся, аки вторый Назарет тую явившая.
Радуйся, яже никогоже упования отвратившая;
Радуйся, всех молитвы тепле приемлющая.
Радуйся, здравие нам подавающая;
Радуйся, ко спасению нас возводящая.
Радуйся, Похвало Почаевская и всего мира Надеждо и Утешение.

Кондак 12

Благодать исцелений и умиления молитвенного от Твоея, Владычице, иконы источаемая, да не вотще душам нашим будет, аще бо грех ради во окамененное бесчувствие впадохом; обаче, яко имущая власть мертвыя воскрешати, и наше пробуди душевное омертвление, и помыслом лучшим сердца наша озари, да греховную прелесть возненавидевше, воспоем Богу: Аллилуиа.

Люди: Аллилуиа (х 3)

Икос 12

Поюще Твоя чудеса во обители Почаевстей явленная, молим Тя, Владычице, лица Твоего от страны нашея не отврати, но и всем приходящим на святую гору Твою и милости от Тебе ищущим во благое прошение исполни, да вси воспоют Ти сице:

Радуйся, всеправеднаго Бога умилоствление;
Радуйся, христиан ко Христу дерзновение.
Радуйся, торжество веры в Лавре Твоей являющая;
Радуйся, сердца человеков любовью распалаящая.
Радуйся, яко древним чудесем подобное зде видети людие сподобишася;
Радуйся, яко гора сия, аки второй Синай, в странах христианских прославися.
Радуйся, Бога на земли явльшагося во чреве Твоем понесшая;
Радуйся, человеки молитвою Твоею к Богу возносящая.
Радуйся, икону Твою, яко проповедницу спасения во обители Твоей оставившая;
Радуйся, след стопы Твоея, целебною водою исполняемый, чудесы прославившая.
Радуйся, с Небесных высот на рабы Твоя призирающая;
Радуйся, на благия деяния верныя наставляющая.
Радуйся, Похвало Почаевская и всего мира Надеждо и Утешение.

Кондак 13

О всепетая Мати Христа Бога, вся роды христианским любовью Себе всыновившая достойная похвалы воспети Тебе недоумеем мы, грешнии, обаче любовью Твоею побеждаемии и к Твоему чудотворному образу очи своя возносяше, молим Тя: в борении и нуждах наших не остави чад Твоих, заступлению Твоему тепле верующих и Сыну Твоему вопиющих: Аллилуиа. *(Этот кондак читается трижды, затем икос 1 и кондак 1)*

Люди: Аллилуиа (х 3)

Икос 1

Архангел Гавриил первее радуйся тебе приношаше, Владычице, егда зачатие Сына Божия благовествоваше, по преславнем же Успении Твоем вся Небесныя силы туюжде хвалу на Небеси Тебе непрестанно приносят; како убо мы, грешнии, своя гласы с гласы Безплотных совокупити дерзнем? Обаче милосердие Твое ко всем кающимся поминающе, устне наша со страхом и любовью отверзаем, глаголюще сице:

Радуйся, милости бездно;
Радуйся, любви неистощимое море.
Радуйся, рода христианскаго Благая Предстательнице;
Радуйся, обители Почаевския стено нерушимая.
Радуйся, православныя люди на гору Почаевскую узами любви привлекающая;
Радуйся, всякую печаль от душ их отгоняющая.
Радуйся, Еяже чудотворный образ, яко звезда, от горы Почаевския нас путеводствует;
Радуйся, Ейже возносимыя молитвы страстныя прилоги вскоре отражают.
Радуйся, явлением Своим на горе сей люди утешившая;
Радуйся, след стопы Твоея на ней нам оставившая.
Радуйся, верных присное дерзновение;

Радуйся, сумнящихся доброе утверждение.
Радуйся, Похвало Почаевская и всего мира Надеждо и Утешение.

Кондак 1

Взбранной Воеводе родов христианских и страны наша известней Избавительнице хвалебныя песни принесем, вернии, на святей горе Ея собравшеся; Ты же, яко имущая милосердие неизреченное, О Владычице Богородице, моления нашего пред чудотворным Твоим образом возносимаго не отвержи, да в умилении сердец зовем Ти: Радуйся, Похвало Почаевская и всего мира Надеждо и Утешение.

Диакон: Паки и паки миром Господу помолимся.

Хор: Господи, помилуй.

Диакон: Заступи, спаси, помилуй и сохрани нас, Боже, Твоею благодатию.

Хор: Господи, помилуй

Диакон: Пресвятую, пречистую, преблагословенную, славную Владычицу нашу Богородицу и Приснодеву Марию, со всеми святыми помянувше, сами себе, и друг друга, и весь живот наш Христу Богу предадим.

Хор: Тебе, Господи.

Священник: Яко Твоя держава, и Твое есть Царство, и сила, и слава, Отца и Сына, и Святого Духа, ныне и присно, и во веки веков.

Хор: Аминь.

Диакон: Вонмем, премудрость, вонмем, *прокимен глас 4-й:* Помяну имя Твое во всяком роде и роде.

Хор: Помяну имя Твое...

Диакон: Слыши, Дщи, и виждь и приклони ухо твое.

Хор: Помяну имя Твое...

Диакон: Господу помолимся.

Хор: Господи помилуй.

Священник: Яко свят еси, Боже наш...

Диакон: Всякое дыхание да хвалит Господа.

Хор: Всякое дыхание да хвалит Господа.

Диакон: Хвалите Бога во святых Его, хвалите Его во утверждении силы Его.

Хор: Всякое дыхание да хвалит Господа.

Диакон: И о сподобится нам слышанию святого Евангелия ...

Хор: Господи помилуй. (х 3)

Диакон: Премудрость, прости...

Священник: Мир всем.

Хор: И духови твоему.

Священник: От Луки Святого Евангелия чтение.

Хор: Слава Тебе...

Диакон: Вонмем.

(Луки 1:39-48, 56)

Встав Мария во те дни, с поспешностью пошла в нагорную страну, в город Иудин, и вошла в дом Захарии, и приветствовала Елисавету. Когда Елисавета услышала приветствие Марии, взыграл младенец во чреве ее; и Елисавета исполнилась Святого Духа, и воскликнула громким голосом, и сказала: благословенна Ты между женами, и благословен плод чрева Твоего! И откуда это мне, что пришла Матерь Господа моего ко мне? Ибо, когда голос приветствия Твоего дошел до слуха моего, взыграл младенец радостно во чреве моем. И блаженна Уверовавшая, потому что совершится сказанное Ей от Господа. И сказала Мария: величит душа Моя Господа, и возрадовался дух Мой о Боге, Спасителе Моем, что призрел Он на смирение Рабы Своей, ибо отныне будут ублажать Меня все роды; Пребыла же Мария с нею около трех месяцев, и возвратилась в дом свой

Хор: Слава Тебе...

Священник: Пресвятая Богородице, спаси нас.

Хор: Пресвятая Богородице, спаси нас.

Священник: Слава...

Хор: и ныне...

Достойно есть...

Диакон: Помилуй нас, Боже. по велицей милости Твоей, молимтися услыши и помилуй.

Хор: Господи помилуй. (3 х)

Диакон: Еще молимся о всех Православных Христианах и о спасении их.

Диакон: Еще молимся о Господине и отце нашем Блаженешем Митрополите Ионе и о Господине нашем Высокопреосвященешем Архиепископе Серафиме и о всем во Христе братии нашей.

Хор: Господи помилуй. (3 х)

Диакон: Еще молимся о стране нашей властех и воинстве ея.

Хор: Господи помилуй. (3 х)

Диакон: Еще молимся о милости, жизни, мире, здравии, спасении, посещении, прощении и благопоспешении рабов Божиих (*имена служащего духовенства и по запискам*).

Хор: Господи помилуй. (3 х)

Диакон: Еще молимся Тебе Господу Богу нашему, еже услышати глас моления нашего, и молитве и помиловати рабов Твоих (*имена по запискам*) благодатию и щедротами Твоими, и исполнити вся прошения их, и простити им вся согрешения вольная и невольная. Благоприятным же быти мольбам и милостыням их пред престолом величества Твоего, и покрыти их от враг видимых и невидимых, от всякия напасти, беды и скорби, и недугов избавити, и подати им здравие с долгодентсвием, рцем вси, Господи, услыши и помилуй.

Хор: Господи помилуй. (3 х)

Диакон: Еще молимся о предстоящих людех, ожидающих от Тебе великия и богатя милости, за всю братию и за вся христианы.

Хор: Господи помилуй. (3 х)

Священник: Услыши ны, Боже ...

Диакон: Ко пресвятей Владычице нашей Богородице и приснодеве Марии помолимся.

Хор: Пресвятая Богородице, спаси нас.

Молитва ко Пресвятой Богородице перед Ея иконой, именуемой “Почаевская”

К Тебе, о Богомати, молитвенно притекаем мы, грешнии, чудеса Твоя во святей Лавре Почаевстей явленная гюминающе и о своих сокрушающесе прегрешениих. Вемы, Владычице, вемы, яко не подобаше нам, грешным, чесого просити, токмо о еже Праведному Судии беззакония наша оставити нам. Вся бо, нами в житии претерпенная, скорби же, и нужды, и болезни, яко плоды падений наших, прозябоша нам, Богу сия на исправление наше попускающе. Темже вся сия истиною и судом Своим наведе Господь на грешныя рабы Своя, иже в печалех своих к заступлению Твоему, Пречистая, притекоша и во умилении сердец к Тебе взывают сице: грехов и беззаконий наших, Благая, не помяни, но паче всечестныя руце Твоя воздвигши к Сыну Твоему и Богу предстани, да люте содеянная нами отпустит нам, да за премногия неисполненная обещания наша лица Своего от рабов Своих не отвратит, да благодати Своя, спасению нашему пособствующия, от душ наших не отъимет. Ей, Владычице, буди спасению нашему Ходатаица и, малодушия нашего не возгнушавшися, призри на стенания наша, яже в бедах и скорбех наших пред чудотворным Твоим образом возносим. Просвети умиленными помыслы умы наша, веру нашу укрепи, надежду утверди, любви сладчайший дар сподоби нас прияти. Сими убо, Пречистая, дарованьми, а не болезнями и скорбьми живот наш ко спасению да возводится, но от уныния и отчаяния души наша ограждающи, избави нас маломощных от находящих на ны бед, и нужд, и клеветы человеческия и болезней нестерпимых. Даруй мир и благоустроение жительству христианскому предстательством Твоим, Владычице, утверди православную веру в стране нашей, во всем в мире. Церковь Апостольскую и Соборную умалению не предаждь, уставы святых отец на веки непоколебимы сохрани, всех к Тебе притекающих от рова погибельнаго спаси. Еще же и ересью прельщенных братии наших или веру спасительную в греховных страстех погубивших паки ко истинней вере и покаянию приведи, да вкупе с нами Твоему чудотворному образу поклоняющесе Твое предстательство исповедят. Сподоби убо нас, Пречистая Госпоже Богородице, еще в животе сем победу истины Твоим заступлением узрети, сподоби нас благодатную радость прежде кончины нашея восприяти, якоже древле насельники почаевстии Твоим явлением победители и просветители агарян показала еси, да вси мы благодарным сердцем вкупе со ангелы, и пророки, и апостолы, и со всеми святыми Твое милосердие прославляюще, воздадим славу, честь и поклонение в Троице певаемому Богу Отцу, и Сыну, и Святому Духу во веки веков. Аминь.

Диакон: Премудрость.

Хор: Пресвятая Богородице, спаси нас.

Хор: Честнейшую херувим и славнейшую без сравнения серафим, без истления Бога Слова рождшую, сущую Богородицу Тя величаем.

Священник: Слава Тебе, Христе Боже, упование наше, слава Тебе.

Хор: Слава Отцу и Сыну и Святому Духу, / ныне и присно, и во веки веков. Аминь. Господи, помилуй (трижды). / Благослови.

Отпуст: Христос истинный Бог наш...

Хор: Аминь.

Величание

Величаем Тя, Пресвятая Дево, и почитаем честную икону Твою, юже от лет древних на горе Почаевстей прославила еси.